



Synfocity = 965

mail us at : mzsynfo@gmail.com; mizoramsynod@gmail.com - Phone - 2314648

November 28, 2024

❑ Synod Executive Committee (SEC) vawi 309-na leh 310-na an ñu

November 27, 2024 (Nilaini) khan Synod Executive Committee (SEC) vawi 309-na chu J.M. Lloyd Hall, Synod Office-ah an ñu a. Meeting hi Moderator, Rev. R. Vanlalngbaka'n a kaihruai a. Rev. P.B. Mankima, Synod Secretary-in report a pe.

Report-ah hian Mizoram Christian College (MCC) sakna tur lungphun phum a nih thu te, Falkawna Synod Khualbuk hawn a nih thu te, Pastor Bial thar hawn a nih thu te, Synod Hospital Compound chhunga damlo kantute tan chawlhbuk (waiting shed) sak a nih thu te leh Pro Pastor tharte tan Orientation neih a nih thu te tarlan a ni.

He ñut khawmah hian thu ngaihtuah tura chhawpchuah 16 a awm a, chung zingah chuan Nupa chungchang dan enñat chungchang te, Central KTP Leader thlan chungchang te, CCM puala Special Sunday siam rawtna te, Kohhran Hmeichhe Co-ordinator leh Central Kohhran Hmeichhe General Secretary tur chungchang te leh Presbyterian English School (PES) ña zawka enkawl dan tur chungchang te a tel a ni.

November 28, 2024 (Ningani) hian Synod Executive Committee (SEC) vawi 310-na an ñu zawm lehngal a. He ñut khawm hi Budget Session a ni a. Synod Department hrang hrang budget ruahmanna, Synod Finance Committee-in a pawm tawh chu ngaihtuah ho a ni. SEC-in Budget hi a pawm fel hnuah Synod Inkhawmpuia ngaihtuah tura chhawp chuah a ni ang.

❑ Synod Inkhawmpui

Synod Inkhawmpui vawi 101-na chu December 3 - 8, 2024 chhung hian Mission Vengthlang Kohhran Biak Inah neih a ni dawn a, hemi hma hian Committee hrang hrang an ñukhawm chho mek bawk. December 3 (Thawhleñi)-ah Nomination Committee an ñu ang a. December 4 - 7 chhungin Rorel a ni ang a, zan lamah vantlang Pathian Biak inkhawm neih ñin a ni ang. December 8 (Pathianni) chawhmaah Pastor nemngheh leh Pro. Pastor ruat inkhawm neih a ni ang a, chawhnuah Lalpa Zanriah Sakramen inkhawm a ni ang a, Zan Inkhawmah Moderator valedictory sermon ngaihthlak a ni ang.

Kumin Synod Inkhawmpui Thlarau lam thupui chu 'Lalpa kawng buatsaih' (Isaia 40:3-5) a ni a, December 7 (Inrinni) zanah Rev. C. Sapkaia, Khatla-in thlarau lam thupui a sawi ang.

Kumin 2024 Synod Inkhawmpuia Puipa turte chu heng te hi an ni :

Moderator	:	Rev. R.C. Lalngakliana
Secretaries	:	Rev. P.B. Mankima (Sr.) Upa Vanlalsawma Siakeng (Jr.)
Finance Officers	:	Rev. V.L. Luaia Hranleh Rev. P.C. Pachhunga
Statistician	:	Rev. H. Laltlanthanga
Senior Exe. Secretary	:	Rev. C. Zorammawia
Executive Secretary	:	Rev. Dr. K. Lallawmzuala

Synod Inkhawmpui hi kum 2010 añang khan Bial-in an thleng ñan a, kumin 2024 hian Mission Vengthlang Bialin Mission Vengthlang Kohhranah an thleng dawn a ni.

❑ Praise On 2024

Synfo leh Central KTP buatsaih Praise On 2024 Mal zai intihsiakna chu November 22, 2024 (Zirtawpni) zan khan Dawrpui Kohhran Centenary Hall-ah Grand Finale neih a ni a, hemi hunah hian intihsiak result puan niin lawmman sem zui nghal a ni. Praise on 2024 atana thlan chu Lalthlanawma, Ramhlun Branch a ni a, pahñihna chu J. Lalruatsangi, Sihphir Branch niin, pathumna chu Samuel Lalmuanchhana, Armed Veng Branch te an ni.

November 21, 2024 (Ningani) zan khan Dawrpui Kohhran Centenary Hall-ah Top 5 intihsiakna neih a ni a, hetah hian hla pahñih - mahni hla duh ber leh judge te hla thlan chhuah hmangan an intihsiak a ni.

Contd...

Praise On 2024 mal zai intihsiakna pakhatna hian lawmman ₹ 1,20,000; pahnihnain ₹ 70,000; pathumnain ₹ 50,000 an dawng a, Citation an dawng vek bawk. Top 5 chinin ₹ 15,000 an dawng a, Top 10 tling dangte pawhin ₹ 10,000 an dawng vek bawk.

Praise On 2024 Mal zai intihsiak hi September 6, 2024 aṅang khan neih ṅan a ni a, Audition hi hmung a - Champhai Venglai Kohhran, New Serchhip Kohhran, Kolasib Hmar Veng Kohhran, Lunglei Bazar Veng Kohhran leh Tuikual Kohhranah neih a ni. Praise on 2024-ah hian KṪP Branch hrang hrang aṅangin mi 300 chuang an tel a ni.

❑ **Presbyterian Bible School (PBS) Farewell & Dedication vawi 59-na**

November 22, 2024 (Zirtawpni) chawhnu dar 1:00 khan Presbyterian Bible School (PBS) chuan Batch 59-na pualin Farewell and Dedication Programme, Pi Zaii Hall, Synod Conference Centre, Mission Vengah an hmang.

Programme hi Rev. Lalrinsanga, Principal-in a kaihrui a, Rev. C. Lalduhawma, PBS Zirtirtuin report a pe a, Rev. R.C. Lalngakliana, Moderator Elect-in zir chhuakte hnenah Certificate a hlan a, Rev. Dr. K. Lallawmzuala, Executive Secretary-in thuchah a sawi. Zirlai exam-a ti ṅhate hnenah Upa Vanlalsawma Siakeng, Synod Secretary (Jr)-in lawmman a hlan a, class kai kimte hnenah Rev. H.T. Ziona, PBS Committee member-in lawmman a hlan a, Pu C. Awithanga Award chu Pu C. Awithanga chhungten an hlan a ni.

PBS-ah hian a din tirh aṅangin tun thleng hian zirlai 2816 an awm tawh a, chung zinga 2351 chuan ṅha takin an pass tawh a. Tuna batch 59-naah hian zirlai 56 awmin zirlai 46-in ṅha takin an pass a, exam lo 10 an awm.

Exam-a ti ṅha zual pathumte hnenah lawmman ₹ 1000/-, ₹ 700/-, ₹ 500/- leh lawmpuina thuziak PBS Committee hminga hlan a ni a, chungte chu:-

1-na - Lalnunsiamia s/o Vanlalhruaia, Gilgal Kohhran, Hortoki

2-na - Zothanmawia s/o P. Lalkhama, Electric Veng Kohhran

3-na - Lalhriattira s/o Lalengzauva, Electric Veng Kohhran.

Batch 59-na zirlai zingah hian class kai kim mi 13 hnenah lawmman ₹ 500/- ṅheuh hlan a ni.

Kum 2014 aṅangin Christian Theology subject leh Kohhran Inrelbawlina & PCI Danpui subject-a ti ṅha berte hnenah Pu C. Awithanga Award hlan ṅhin a ni a. Batch 59-naah hian Kristian Theology leh Kohhran Inrelbawlina & PCI Danpui subject-ah Lalhriattira'n Award a dawng ve ve a ni. Award hian ₹ 1000/- a keng tel a ni.

❑ **Pastoral Care & Counselling Training vawi 32-na**

November 25, 2024 (Thawṅṅanni) khan Pi Zaii Hall, Synod Conference Centre-ah November 14-25, 2024 chhunga Family Guidance & Counselling Centre (FG&CC)-in Pastoral Care & Counselling Training vawi 32-na an buatsaih chu kharna hun hman a ni a, tun ṅumah hian Pastor 16 an tel thei a ni.

Training kharna hun hi Rev. Lalthangpuia, FG&CC Director-in a kaihrui a, Rev. Lalsangbera, Resource Person-in kalkhawmte lawmna neiin lawmthu a sawi a, Rev. K. Lalrinmawia, Resource Person-in Final Evaluation a tihpui a. Rev. V.L. Luaia Hranleh, Executive Secretary-in Certificate a sem zawhin thuchah a sawi zui bawk. Trainee-te aṅangin group zai ngaihthlak a ni a, Trainee-te tana ṅawngṅaisakna hun Rev. Lalfakzuala, Committee Member-in a hmang a ni. Hemi hunah hian Tv. Israela Pachau leh NI. Vanlallawmi te an zai bawk.

FG&CC hian Pastor leh Kohhrana rawngbawltu pawimawh (Church Leader)-te pualin Counselling Training a buatsaih ṅhin a. Pastor-te pual hian kum 1992 aṅang khan buatsaih ṅhinin Pastor 577 training chhuak an awm tawh a ni.

Synod hian Counselling Centre pakua a nei mek a, heng Counselling Centre pakuaah hian October 8, 2024 thlenga pantu (client) an neih tawh zat chu 78,040 a ni a, kumin 2024 bikah mi 5,251 an nei tawh a ni.

❑ **MSSU**

November 30, 2024 (Inrinni) hian Khawzawl Venglai Bialah Sunday School Zirtirtu training neihpui turin trainer-te, Upa Lalthanchhunga, Upa Isak Zarzoliana Chhangte leh Upa C. Lalbiaksanga te an kal ang.

☐ **Kohhran Hmeichhe Ni**

November 29, 2024 (Zirtawpni) hi Kohhran Hmeichhe Ni vawi 28-na a ni a, Presbyterian Kohhran Hmeichhiate chuan hemi pual hian Bial leh Kohhranah tha an tih angin programme an hmang ang. Kumin Kohhran Hmeichhe Niah hian thupui inang tlang, 'Sister Lianchhungi chanchin' Pi Sailuti ziah chu an zir dawn a ni.

Kohhran Hmeichhia hi Zosap, Rev. D.E. Jones-a nupui Mrs. Catherine Ellen Williams (Pi Zosaphluii)-in kum 1904-ah a din a. Mizo hmeichhia, a bik takin nu te chu Pathian thu te hrilhin, kut themthiam leh hriselna lam te a zirtir a. Khasi nu Pi Siniboni pawh amah puitu tlang tak a ni a, hun kal zelah Bible Women-te nen thawk hovin Kohhran tinah Kohhran Hmeichhia a lo ding zel a ni.

Kohhran Hmeichhe Inkhawmpui Lian-in Kohhran Hmeichhe Ni bik neih a rel a, Synod Executive Committee (SEC)-in November thla Zirtawpni hnunung ber hi Kohhran Hmeichhe Ni atan hman ni se tia a relsak angin, kum 1997 atang khan hman tan niin, Synod Calendar-ah pawh Synod Ni pawimawh zingah dah tel a ni.

Kohhran Hmeichhe Ni atana November thla Zirtawpni hnunung ber hman a nih chhan hi Pu Zosaphluia 'n a diary-ah Pi Hluid'n zirtawpniah Hmeichhiate chu inkhawm a neihpui thin tih a ziah a. Inkhawm a neihpui tan ni chiah hi sawi lan a ni lo va, January 1904-ah Mizorama lo chhuak kha a ni a. A lo chhuah kum tawp lamah chuan Hmeichhiate hi bul a tanpui tawh ngei ang tih a rin theih a. Chuvangin Pi Zosaphluid Mizorama a lo chhuah kum tawp lam November thla Zirtawpni hnunung ber chu Kohhran Hmeichhe Nia hman turin Synod Executive Committee (SEC) chuan rem tiin, kum 1904 chu Kohhran Hmeichhe din tan kumah a pawm nghal bawh a ni.

☐ **Kohhran Hmeichhia**

Kum 2025 chhunga Women Centre, Phunchawnga thawk turin Women Centre Managing Committee chuan Puanthui zirtirtu leh Security Guard a la thar a, an hna hi 2025 January atangin an thawk tan ang.

Puanthui zirtirtu:

R. Vanlaltlani d/o R. Lalthavunga, Lallen khua

P.C. Lalhriatzela d/o Lalramzauva Pachuau, Zonuam

Security Guard:

Lalvulmawia s/o Sanlianmawia, Saizawh West

☐ **Synod Mission Board**

◆ **Tripura Mission Field**

November 21, 2024 (Ningani) khan belhtu thar 49 an awm.

◆ **Lucknow Mission Field**

November 23, 2024 (Inrinni) khan belhtu thar paruk an awm.

◆ **Nepal Mission Field**

November 24, 2024 (Pathianni) khan belhtu thar pahnih an awm.

◆ **Calcutta Mission Field**

November 24, 2024 (Pathianni) khan belhtu thar 12 an awm.

◆ **Arunachal & Assam Mission Field (East)**

November 24, 2024 (Pathianni) khan belhtu thar pakhat a awm.

◆ **Arunachal & Assam Mission Field (West)**

November 24, 2024 (Pathianni) khan belhtu thar pakhat a awm.

◆ **Jharkhand Mission Field**

November 24, 2024 (Pathianni) khan belhtu thar paruk an awm a, kohhran dang atangin chungkaw khat (member 3) kan kohhranah an rawn inpe bawh.

◆ **Karbi Anglong Mission Field**

November 24, 2024 (Pathianni) khan belhtu thar 10 an awm.

◆ **Assam Mission Field**

November 24, 2024 (Pathianni) khan belhtu thar pathum an awm a, ni 25 (Thawhtanni) khan belhtu thar pathum an awm bawh.

☐ **Bible Sunday**

December 1 (Pathianni) hi Bible Sunday a ni a, Presbyterian Kohhran te chuan Bible Sunday pualin inkhawm vawi hnih neih tura ruahman a ni. Chawhnu inkhawmah thupui chu ‘Bible thil tih theihna’ a ni a, Zan inkhawm thupui chu ‘Bible - lehkhabu ngaihna’ a ni.

Bible Sunday kan hman chhan chu Bible thehdarh kawngah intihchak tharna atan a ni a, a hman dan tur hi Bible Society of India, Aizawl Auxiliary Office lam atangin ruahman thin a ni a, chu chu Kohhran hrang hrangin kan zui thin. Bible Sunday-ah hian Bible Society pualin inkhawm vawi khat thawhlawm lakkhawm thin a ni baw.

☐ **Synod Relief Fund**

Tun hnaia harsatna hrang hrang tawkte hnenah Synod Relief Fund atangin hetiang hian chhawmdawlina pek a ni.

S.No	Khua/Veng	Pek chhan	Chhungkaw zat	Pek zat
1.	Phuaibuang Vengthar Kohhran Biak In lungrem chim siam that nan		₹	50,000/-
2.	Rawpui Kohhran leimin dawlina atan		₹	50,000/-
3.	Phaizawl, Champhai Bethel	In kang	1	₹ 20,000/-
4.	Leitan East	Damlo	1	₹ 10,000/-
5.	Lily Veng North	Khawsak harsa	1	₹ 10,000/-
6.	Model Veng	Damlo	1	₹ 10,000/-
7.	West Serzawl	Damlo	1	₹ 10,000/-
8.	Tuidam	Damlo	1	₹ 10,000/-
9.	South Sabual	Damlo	1	₹ 10,000/-
			Belh khawm	₹ 1,80,000/-

☐ **FM Zoawi - Aizawl & Lunglei : Hruaina Eng Radio Programme**

November 29, 2024 (Zirtawpni) @ 7:30 p.m. :

- Solo** : Zoramchhani - Ka zui ang che
- Zaipawl** : Khatla Pastor Bial Zaipawl - Aw ka thlarau fak rawh
- Thusawi** : Rev. H.L. Thianghlina - Thalaite leh tunlai khawvel
- Solo** : Malsawmzuali - Ka vah bo san tawh law'ng

Rawngbawlina report

☐ **Hruaina Eng TV Programme**

- 28.11.2024 (Ningani)** 8:30 pm : Thupui zir bing
- 29.11.2024 (Zirtawpni)** 5:00 pm : Kristian Naupang Pual
- 30.11.2024 (Inrinni)** 5:30 pm : Puitling Sunday School Zirlai
- 01.12.2024 (Pathianni)** 8:00 am : Weekly round up
- 5:30 pm : Su Samachar Prasaran
- 02.12.2024 (Thawhtanni)** 8:30 pm : Hruaina Eng luangchhuak

SYNOD REVIVAL HRIATTIRNA

December 3-7, 2024 chhung hian Synod Revival Camping Center, Neihbawiah a duh apiang tan Camping buatsaih a ni dawn a. Speaker tur chu Upa C. Zanghinglova, Jehova Jire Team a ni ang. Camping Fee mi pakhat tan Rs.100/- a ni a, Mutbu bakah Bible, Hlabu, Pen, Note Bu ken tur a ni. Ruihtheih thil ken luh phal a ni lo a. Mobile Phone pawh ken luh phal a ni lo. Thawhlehniah lutin Inrinniah chhuah leh tur a ni ang. Camp neihna hmun Neihbawiah chhun dar 12 - tlai dar 4 inkarah Registration tih fel vek tur a ni a, rokhawlhna lian tak nei an nih loh chuan tlai dar 4 hnu lamah in Register theih a ni lo ang. Ei leh in chu Synod-in a tum vek dawn a ni.